




Israel-i Gaza nung osangbenertem süki amak; nisung ana asü

Shooting World Cup: Rudrankksh Patil-i gold angu



Kohima nung public rally ka agitsü

Kohima, April 7, 2025 (TYO): Angami Public Organisation (APO) aser Kohima nung Naga Tribal Units-i April 9, 2025 nü Indo-Myanmar Border atsüdangba aser tanga onüktem atema public rally ka agitsü. Iba sentong ya Old MLA

Hostel Junction, Kohima nung anepang 10:00 ako nungi tenzüksü. Iba sülen APO aser Kohima nung Naga Tribe units külemi Nagaland Governor ajanga Union Home Minister dangi shidi ka yoktsü.

LPG cylinder ka nung Rs 50 tuogo

New Delhi, April 7, 2025 (Agencies): Centre-i LPG cylinder shia nung Rs 50 ajungketogo aser iba ya subsidised aser general category customers ajak atema lir ta Union Oil Minister Hardeep Singh Puri-i metetdaksü. Ujjawala kübok sensakertemi LPG connection angati angur aser parnoki tanü nungi New Delhi nung 14.2-kg cylinder nung Rs 553 agi alitsü. Jenjang matu tashi New Delhi nung cylinder ka nung Rs 503 agi yoka liasü. Külen, general users atema 14.2-kg cylinder jenjang Rs 853 kümogo. LPG cylinder jenjang ya tax agiba nung ajemdaker state shia

jenjang balala asütsü. Yaküm March ita cylinder ka nung Rs 100 ajemba sülen tang ang jenjang reprangshir. Taoba hopta commercial LPG gas cylinders nung Rs 41 ajema liasü. Iba ajanga restaurants, hotels aser tanga commercial establishments nung kongshia liasü. Hombarnü Centre sorkarisa petrol aser diesel nung excise duty tuogo, saka iba ya consumers keti maotsü saka oil marketing company temi dang menoktsü. Petrol litre ka nung excise duty Rs 13 aser diesel litre nung Rs 10 atur. Iba ya April 8, 2025 nungi mapa küma tenzüksü ta ketdangsür kati ashi.

WSH-i Foothill Road yangluba reprangdang

Dimapur, April 7, 2025 (TYO): Western Sumi Hoho züngsemtem den SDO, (R&B) Dimapur Division, EAC Aghunaqa aser contractor N. Chisho Swu & Sons nungeri Foothill Road yangluba reprangdangogo. April 7, 2025 nü Niuland District kübok Hovukhu Village adena Niuland Town nungi Wokha District kübok Ralan Area tashi parnoki lenmang yangluba reprangdanga senzü. DPR nung sorkar latetja aliba ama iba tesem nung mapa inyakba ngua temulung asür ta Media Cell, WSH-i sangdong ka nung ashi. "Foothill road ya Naga nunger aser talisa Western Sumi nunger atema kanga dang aginüa aruba lenmang ka lir. Iba lenmang yangluzükba sülen Nagaland nung alirtem nem lenmang aisü

nung teyari agütsütsü aser rongsenketzüng jenjang renloksü" ta WSH-isa ashi. Chief Minister Neiphiu Rio aser Minister (R&B) Katio Aye na lenisüba kübok Nagaland Foothills Road asangsang nung yangluba atema kanga pelar aser tenati inyakba mapa Nagaland putiotsü nung teti atema zülüoka ayutsü ta parnokisa ashi. WSH-isa nübortem dang Foothill Road yangluba nung mapa inyakertem, workers, contractor(s) nem tetsükdaksü mesüra tenokdangba kecha magütsütsü mepishia metetdaksüogo. Parnokisa contractor(s) dang iba otsüsütsü lenmang kanga junga yanglutsü aser lezmükja aliba mapang tsüngda renemtsü mepishia metetdaksü.

Assam sülen Meghalaya-i tourist teimba aru

Shillong, April 7, 2025 (Agencies): Northeastern state tem rongnung domestic tourist teimba arubaji Assam sülen Meghalaya lir ta Union Minister of State for DoNER, Sukanta Majumdar-i metetdaksüogo. 2024-25 financial year mapang Meghalaya-i domestic tourists 1,371,674 aru. Kasa mapang Assam-i domestic visitors 7,612,720 arua liasü aser

foreign tourists 19,973 aru. Northeast nung foreign tourists teimba arubaji Sikkim nung liasü. Sikkim-i tourist 93,908 aru, parnok sülen Tripura-i 66,708 aser Assam-i foreign tourists 23,818 arua liasü. Northeast nung tourist tajemtiba arubaji Manipur nung liasü aser 2024-25 financial year nung domestic 57,701 aser foreign visitors 3,688 dang aru.

MHA-i AFSPA atsülangba magizüker; khenyongi agientsüla: NSF Kaketshir teloktemi Armed Forces den amalitep malitsüla

Dimapur, April 7, 2025 (TYO): Ministry of Home Affairs-i Nagaland nung Armed Forces (Special Powers) Act, 1958 (AFSPA) atsülangba aitsür ta Naga Students' Federation (NSF)-i metetdaksüogo. April 1, 2025 nungi tenzüka ano ita trok tashi ozü ali AFSPA kübok 'disturbed area' ta züngshiba ya Naga nunger akhüm, temetenten aser taginübatem anema lir ta NSF-i ashi. Naga nung mapang shia onoki olemtep aser tim inyaksangshi ajanga yimjung aser yimten latetdaksünür ta sayua aruogo. Ajsüuka India sorkari ozü lima madak mitkar nem tashi agüja

inyakdaksür aser British nunger yimsüsüba mapang benshiba ozüngtem benoker ta NSF-i sangdong ka nung ashi. "AFSPA ajanga Naga nunger kibong aika nem tejashi, teraksa aser tetsübu bentsür aruogo. Tanü putu nung iba ozüng benshitsü atsülangba ya Indo-Naga yimten olemtep mezüngmeshiba dang masü saka ozü nübortem külemi yimjung aser temeten aginüa ola adokba nembangtsü inyakyim ka lir" ta President Medovi Rhi aser Asst. General Secretary Kenilo Kent nati sangdong ka nung ashi. Naga lima nung AFSPA khenyongi agientsü akhangba onoki nenshir. Ali atsünga agiba

aser mitakar nem yimsü sädaksüba ajanga kodanga yimjung bener marutsü ta NSF-isa ashi. "NSF nung Federating Units aser subordinate bodies ajaki Indian armed forces den amalitep malitsü inyakyim akangakanga benshitsü nenshir. Asen lima nungi AFSPA khenyongi magien tashi Naga kaketshir telok ajaki armed forces den joint programs, civic action initiatives, mesüra ceremonial events nung madentsü nenshir. Iba inyakyim sülen anidakba ya lungkak aitba masü saka asen nübortem temeten aser tarutsü kümzüka ayutsü atema inyakba mapa ka lir" ta mendenpurtemisa metetdaksü.

Arrtsü anüktsü atema Electronic Surveillance Systems amshitsü

New Delhi, April 7, 2025 (Agencies): Centre sorkari arrtsütem aser talisa Pakistan aser Bangladesh den arrtsü akangshitsü ta Union Home Minister Amit Shah-i ashi. Kiralongrartem dena ozüng alema arurtemi küm aika India lushii telungi aiter aser sorkari arrtsü anüktsü atema technology

amshitsü tebilemba lir. Jammu and Kashmir kübok International Border anasa BSF Border Outpost 'Vinay' semdangdang Amit Shah-i iba osang lemsatep. Centre sorkari arrtsü akangshitsü atema electronic surveillance system amshitsü ta pai ashi.

Tang technology maparen 26 tashi tendangdar aser item nung anti-drone systems, tunnel detection aser electronic surveillance dena lir. Sangküm March ita tashi nung item ya mapa küma tenzüksü aser sepaitem asoshi mapa tezübaba akümtsü, ta Amit Shah-isa ashi.

Manipur nung BJP tanishir ka ki rongdoktsüba sülen curfew benok



Imphal, April 7, 2025 (Agencies): Manipur kübok Thoubal district administration-i April 7 nü Lilong assembly constituency ajunga nung BNSS nung Section 163 kübok tenokdangbatem agütsüogo. BJP Minority Morcha Manipur president, Md Asker Ali-i Waqf Amendment Act pusema nungitba atema nisung telok kati tejashi nung par ki rongdoktsüba sülen ketdangsürtemi iba ozüng benok. Iba tesem nung nisung pungu mesüra tema adenshitsü memelar aser public-i prangpong, noklangnok, süng, lung mesüra tanga hadirtem bener senzüba noktanger ta District magistrate-i tetuyuba agütsü. "Deobar aonung nisung

7,000-8,000 shi ka süng aser lung bener Lilong Sambrukhong Mamei area nung Md Asker Ali'er kidangi ao aser mi senoktsü" ta Superintendent of Police-i ashi. Honibarnü Ali-i social media sabang balala nung Waqf Amendment Act, 2025 pusema nungitba metetdakja liasü. Deobarnü iba lendong atalokba sülen pai jembiba olen meyipa agia tatok meshi aser Act aitsüba metetdaksü. Ali ya Meitei-Pangal (Manipuri Muslim) tanishir ka lir aser Thoubal district kübok Lilong constituency nungi lir. "Ni Lilong Haoreibi Sambrukhong nungi Asker Ali lir. Tawa Lok Sabha aser Rajya Sabha nung agizükba Waqf Amendment Bill atema ni video

tem aser tebilembatem lemsatepa liasü. Ni jembiba atema sasar aser tarutsü nung ni iba amai meinyaktsü. Ni Waqf Amendment Bill pusema menungiter aser iba ya meyipa agientsüla" ta Asker Ali-i Facebook post ka nung ashi. Ketdangsürtemi Asker Ali'er ki rongdoktsürtem ano mejangjet lir aser Manipur BJP nungia iba tatalokba atema osang kecha mali. **MPCC-i Waqf (Amendment) Act 2025 magizüker:** Külen, Manipur Pradesh Congress Committee (MPCC) President K Meghachandra-i tanga sangdong ka nung Waqf (Amendment) Act 2025 aitsüba metetdaksüogo. "Narendra Modi'er sorkar indang Waqf (Amendment) Act magizüker ta Manipur Pradesh Congress Committee tenüng nung metetdaksür. Modi'er sorkar Waqf (Amendment) Act ya Constitution aser Article 25 alema lir, kechiyong iba ajanga Right to Freedom of Religion agütsür" ta Meghachandra-i ashi. "Iba ozüng memelaba Act anema ni minorities den külemi noktaker. Ni aser ozü Congress party-i RSS/BJP agenda anema noktaksü aser iba ya ozüng alema lir" ta paisa ashi.

Project Empathy ajanga Kohima nung sentong ka ayongzük



Dimapur, Rongchii/April 07 (TYO): Assam Rifles ajanga Project Empathy kübok Kenguruse Hall, Kohima Garrison nung Naga nung sobaliba wazüka ayuba nung otsü ashiba tashi benjonga sentong ka ayongzüküka liasü.

Iba sentong tenzüküka Project Empathy fiunder, Vibha Lakhera-i jembidang, otsü ashiba ajanga aso balala tsüngta apu alitsü aser Naga nung puti otsü tajungtiba nung angatettsü asoshi iba

mission ya tenzük, ta ashi.

Tongti o jembir Rita Korcha ajanga oral history nung dangar mulungsentsü angatetba ajanga teyari anguba aser sobaliba wazüka ayuba indang jembia liasü.

Iba sentong nung colleges asem nungi kaketshir 160 aser tongtipang nisung 40 adenshia oral history indang tajangshibatam lemsatepa liasü.

Kohima nung psychological researcher, Kevi-i otsü ashiba

ajanga temulungsentsü aser sobaliba nung taneptsü anguba indang lemsatepa liasü.

Iba sentong nung Project Empathy film sayua liasü, kong ola aser otsü mangaoka lir, aser item ya anepalu mesüi yutsü asübo samar alitsüba liasü.

Kaketshir temi bendanga agütsür shilem agiba asoshi tenüngsang agütsüba mapang ka agia liasü, kong Don Bosco College, Modern College aser Oriental College nungi kaketshir tem tushia liasü.

7th Poshan Pakhwada sentong tanü nungi tenzüktsü

Dimapur, Rongchii/April 07 (TYO): Ministry of Women and Child Development ajanga Mission Poshan 2.0 framework nung aliba ama Social & Behaviour Change Communication (SBCC) aser community mobilization ajanga April 8-22, 2025 anogotem 7th Poshan Pakhwada amungtsü.

2018 küm nungi Poshan Maah aser Poshan Pakhwada mapang sensitization activities crore 100 dak tema agiogo aser well-nourished India atema Jan Andolan aniteter.

Taküm Pakhwada nung Ministries/Department 20 dak tema aser stakeholders tem den lungjemer tajangzük aliba mapa inyaktsü. Nagaland sorkar nunga Department of Social Welfare, Department of School

Education, RD-NSRLM, Department of Health & Family Welfare, PHED and Administration, Village Panchayats aser nüburtem alitsü.

Iba campaign mapang First 1000 Days of Life omen nung ajemdaker mashisa akumba nungi tanur arishi küm ana makum tashi tanur aser tetsü achi-ajemtsü indang angazükdaksütsü.

Popularization of the Beneficiary Module omen nung ajemdaker Poshan Tracker Application nung temsüa aliba nisungtem peëi sasa tenüng zülüokdaksütsü.

Management of Malnutrition via the CMAM Protocol kübok C o m m u n i t y - B a s e d Management of Acute

Malnutrition (CMAM) module amshia community-level identification, referral aser malnourished children indang follow-up agitsü.

Healthy Lifestyles to Address Childhood Obesity omen nung ajemdaker nüburtem dang chiyongtsü tali achi-ajemba indang awareness agütsütsü.

Pakhwada ya nukkadnataks, jingles, radio program aser social media engagement amala media campaign ajanga yaritsü.

Ministry balala aser stakeholders tem lungjemer Poshan Pakhwada 2025 yagi Siposhit Bharat tsütsü terenlok asoshi inyaktsü, koba ajanga mashisa tetsür, tanur, teinlonglong aser tajemzükba tia nung alirtem yaritsü.



Indian Red Cross Society Chümoukedima District Branch ajanga Chümoukedima Ward 3 nung kitsük-kirong lendong ajurur alir nem April 7, 2025 nü teyari oset agüja liasü. Iba mapang IRCS Chairman Chümoukedima District Branch Vichutoulie Mere, Honorary Secretary Mhiesitsolie Khate aser Managing member Bendang Chuba nungertem dena liasü.

Army recruitment atema registration anogo atsülang

Dimapur, Rongchii/April 07 (TYO): Lanurtem tali shilem agidaksütsü aser jangra aliba lanurtem nem maongka agütsütsü mechi Indian Army ajanga Nagaland aser Manipur nung recruitment drive asoshi registration anogo atsülangtsügo.

Registration asoshi tang tesüsa anogo atsülangtsüba ua April 25, 2025 tashi alitsü, koba mezüng züngzüktsüba nungi anogo ter tali atsülangtsü.

Mapang shidak nung registration magitetba, talisa meta talang nung alirtem asoshi connectivity tebilemtsü ajuruba aser tawa district kar nung timtem ajuruba ajanga anogo atsülangtsüsa akum.

Registration atema candidate temi official website

www.joinindianarmy.nic.in nung oa personal profile yanglutsüla aser temsüa aliba reprangtsüla.

Candidates temi application form fill up asüba sülen website nung link ka ajanga payment portal kati yoktsü, kong candidates temi sen 250 den bank charges agütsütsü.

Iba sen ya Debit/Credit cards, online banking mesüra UPI ajanga agütsütettsü. Candidates tem active email aser mobile number alitsüla aser ibaji ajanga Indian Army-i osangtsüsang agiteptsü.

Army Recruitment Office, Rangapahar indang helpline number 03862-249012; +91-7628023484, email: swarkokila@nic.in. Candidate temi www.joinindianarmy.nic.in nungia mangatetba asüngdangtettsü.

Assam Rifles temi state nung gari lendong ajurur alir yari

Dimapur, Rongchii/April 07 (TYO): HQ IGAR (North) kübok Assam Rifles Phek Battalion nungi COB New Thewati ajanga Meluri district kübok Washello yimtsüng anasa April 6, 2025 nü civilian indang Bolero ka accident ajuruba yaria liasü.

Iba mapang 12 Assam Rifles personnel nungi Nursing Assistant tem densema arua yirur aliba passenger nem teyari agüja liasü.

Gari ya longren leni meter 100 shi mekazüka alu aser nisung asem yirua liasü.

Par asem rongnung Washello Village nungi Tsomongthe Paul Thsankhur Thuer tekolak yirua liasü, saka temang anepalur tang tajungba lir, Washello yimtsüng nungi Willson Trakha tetsüng kanga sashia yirua Kohima nung temang anepalutar aser kasa yimtsüng nungi Avile tera yirua liasü.



Meluri district nung gari lendong ka nung yiruba nisung ka mozü kidangi ambulance nung bener aodang tangokba noksa nung angur.

Assam Rifles, COB New Thewati ajanga mapang shidak nun goa yariba ajanga lendong nungi takum kumzükba nung shilem tulu agia liasü.

Mokokchung nung pharmacy 54 shibangtsü



Dimapur, Rongchii/April 07 (TYO): Controlling & Licensing Authority, Drugs Controlling Administration, Department of Health and Family Welfare ajanga Mokokchung nung aliba pharmacy tem dang Drugs Control Administration ajanga metetdaksüba ama Registered Pharmacist meshimba yong Drugs and Cosmetic rules 1945 indang Rules-65(2) aser Pharmacy Act 1948 indang

Section-42 nung aibelenba mechi Drugs Control Officer, Mokokchung-i District Administration, Police, Watsu Mungdang aser Ao Kaketshir Mungdang teyari nung April 3, 4 & 5, 2025 anogotem exercise agia Mokokchung jila kübok pharmacy 54 shibangtsügo.

Department aser lokti tentet balalai yaritepba atema pelaba lemsateper, ta Drugs Control Administration ajanga sangdong ka nung ashi.

Wokha DPDB senden April 15 nü amentsü

Dimapur, Rongchii/April 07 (TYO): Deputy Commissioner & Vice Chairman, District Planning & Development Board (DPDB), Wokha ajanga sangdong ka nung, ita shia amenba DPDB senden April 2025 atema Deputy

Commissioner, Wokha indang Conference Hall nung April 15, 2025 anüngdang 11:00 ako nungi amentsü, ta metetdaksü.

Anungji iba senden nung DPDB züngsem ajak arua adentsü ayongzük, ta sangdong ajangasa ashi.



April 07, 2025 nü Bihar kübok Begusarai nung Congress lenir, Rahul Gandhi-i 'Palayan Roko Naukri Do Yatra' nung shilem agidang tangokba noksa nung angur.

India nung nosodang tetsü mesüra tanur asüba ajema kümogo

New Delhi, Rongchii/April 07 (Agencies): 2030 küm tashi nungbo alima nung kinü tanurtem aser nosodang tetsütem asüba rate ji tanur 1,00,000 asoba shia nungi 70 den ishiba asütsü nükjidong lir, ajisüaka tang tashi nungbo iba alizüngji tongtetsüsa masü, ta Lancet study ka ajanga metetdaksü.

India sorkaria sangdong ka ajanga, tanur o kinü tetsü anepaluba dak sendakba nung alima rate dang nungibo India jenjang kanga tajungba, ta metetdaksü.

India nung kinü tanur o tetsütem asüba rate kanga ajema kümogo. World Health Day anogomong nung World Health Organization (WHO)-i sangdong ka ajanga, 2023 küm alima nung mashisa alidang mesüra nosodang asüba minute 2 shia tatalokba kaka liasü, ta metetdaksü.

World Health Day anogomong nung India-ia taküm WHO omen - 'Healthy Beginnings, Hopeful Futures' nung ajemdaker among.

Alima nung mashisa alidang mesüra nosodang asübatem rongnung tongti kuliji azü tali yimdokba agi lir (shilem 27), iba sülen mashisa dak sendakba kuli balala (shilem 23) aser high blood pressure dak sendakba kuli (shilem 16) ajanga liasü, ta Hombanü sayaba Lancet study ajangasa metetdaksü.

Mashisa alidang mesüra nosodang mesüra tanur asoba sülen asüba teimtibaji azü tali yimdokba aser 'sepsis' ajanga liasü.

Alima nung nosodang asüba shilem 1 bo 'anaesthesia' dak sendakba timtem ajanga liasü aser iba kuli ajanga asürtemji talisa sub-Saharan Africa, Western Asia aser Northern Africa tem nung liasü.

India sorkar Ministry of Health & Family Welfare-i sangdong ka ajanga, mashisa tetsütem aser kinü tanurtem anepaluba dak sendakba nung India jenjang kanga junga kümogo; 2014-2016 tsüngda India nung maternal mortality rate (MMR) ji nosodang

tetsütem 1,00,000 shia nungi 130 asü saka 2018-2020 küm nungbo MMR ji tetsütem 1,00,000 shia nungi 70 dang kümogo, ta metetdaksü.

Tesüiba küm 30 tsüngda India nung MMR shilem 83 agi ajemogo saka alima rate bo shilem 42 dang ajem, ta sorkari metetdaksü.

Iba denji kasa infant mortality rate-a, 2014 küm kinü tanur 1000 asoba shia nungi kinü tanur 39 asü, saka 2020 küm nungbo tanur 1000 asoba shia nungi 28 dang asü. Ibaji 2019-20 küm tashi nung shilem 69 ajemba lir, ajisüaka alima nungbo shilem 55 dang ajem.

WHO-i ashiba agi, 2023 küm anogo shia mashisa alirtem mesüra tanur asodang tetsür 700 dak tali asü, ajisüaka junga anepalu asübo itemji nokdangtetla.

WHO-i, "2023 küm low-income linüktem nung MMR ji tanur 100,000 asoba nungi 346 liasü saka high income linüktem nungbo 100,000 shia nungi 10 dang liasü," ta metetdaksü.

Dubai Crown Prince, Dubai Sheikh Hamdan-i India semdangtsü

New Delhi, April 07 (Agencies): Dubai Crown Prince, Sheikh Hamdan bin Mohammed Al Maktoum-i April 8-9 anogotem nung India semdangtsü.

Sheikh Hamdan-i India semdangba mapang nung Ato kilonser Narendra Modi-a ajurutsü, External Affairs Minister S Jaishankar aser Defence Minister Rajnath Singh na den senden amentsü aser India-UAE tesendaktep tajungba akümtsü atema business lenirtem den senden amentsü, ta Hombarnü MEA-

i metetdaksü.

"Dubai Crown Prince, UAE Deputy Ato kilonser aser Defence Minister, Sheikh Hamdan bin Mohammed Al Maktoum-i April 8-9 anogotem nung India semdangtsü," ta Ministry of External Affairs (MEA) sangdong ajnga metetdaksü.

"Crown Prince-i semdangba ajanga India-UAE Comprehensive Strategic Partnership (CSP) jenjang tajungba akümtsü aser Dubai den lenla aika nung tesendaktep tashi

itshitsü," ta MEA-i metetdaksü.

Mumbai nung Crown Prince-i linük anaprongla nungi business lenirtem den senden nung shilem agitsü aser ibaji ajanga India-UAE tsüngda rongsenkettzüng aser commercial tsütsü amalitep jenjang tajungba akümtsü, ta MEA-i metetdaksü.

Bendang linük balala nung India nunger nütsüng teimtiba aliba linükji UAE lir; iba linük nung India nunger million 4.3 lir aser parnok teimbaka Dubai nung mapa inyaktertem lir.

Sorkari petrol aser diesel litre shia nung saru sen 2 tuogo

New Delhi, April 07 (Agencies): India nung petrol aser diesel jenjang atutsüa akok, kechiyong sorkari petrol aser diesel litre shia nung saru sen anana tuogo.

Alima nung crude oil jenjang ajemba aser alima nung shishilembaba tsütsü tetoktepbba kanga aliba mapang ka nung totzü jenjang

atur.

Finance Ministry-i ashiba agi, petrol aser diesel nung saru atuba ya April 8, 2025 nungi mapa küma benoktsü.

Petroleum & Natural Gas Ministry-i, "PSU Oil Marketing Company temi, tanü Excise Duty Rates atuyonga petrol aser diesel retail jenjangbo matutsü ta

shiogo," ta metetdaksü.

April 7, 2025 anogo nung New Delhi nung petrol litre nung sen 94.77 liasü, Mumbai nung sen 103.50, Chennai nung sen 100.80 aser Kolkata nung sen 105.01 liasü. New Delhi nung diesel litre nung sen 87.67, Chennai nung sen 92.39, Mumbai nung sen 90.03 aser Kolkata nung sen 91.82 liasü.

23 Buba WATSÜ MUNGDAW Inti Senden Sentong ANOGO : 10-11 RONGCHII (APRIL) 2025 TESEM : TOWN HALL



Omen : "Yakpangsür"

TONGTI O JEMHIR : Wt. Dr. Lanurenla,
PRINCIPAL, SAO CHANG COLLEGE, TUENSANG

Wb. Rev. Dr. Wati Longchar,
EXECUTIVE DIRECTOR, FTEAP

MENDENPUR:

Wt. S. Arenla Longkumer TIR
Wt. Odisola Ozukum TATONG TIR
Wt. Süngtireben TONGTI ZÜLUR
Wt. Moatula TATONG ZÜLUR

Pianist : Asenla Lemtur

SENTONG I

Anogo : 10 Rongchii (April) 2025 Mapang : 3:00 Ako (Nikongdang)

Mungdang Jungshir : Marepkong Watsü Telen
Mungdang Lapoktsür : Mokokchung Yim Watsü Telen

- Sentong Lenir : Mendenpur
- Pela agizükba : Tir Watsü Mungdang
- Asür bilemtetba : Wt. L. Bendangla Jamir (Taoba Tir, Tongti Zülur)
- Lai zünger sarasademtsü : Wt. Imnasenla, Asso. Pastor Women Chuchuyimlang Baptist Arogo
- Metetpela mapang : Tongti Zülur
- Sobaliba ken : Mopungchuket Watsü Telen
- Salem O : Wt.T. Arenla Longkumer, Secretary Women Ministry ABAM, Impur
- Temeja ken : Mungdang Jungshir
- Ni ya shiner : Wb.Lanutoshi Aier, Tir, Ao Kaketshir Mungdang
- Putitsür ola : I/c Wt. Temsukala, Wt. Sentongla, Wt. S. Anungla Jamir
- Onük : "Kenozülu nung Yakpangsür" Wt. Dr. Lanurenla, Principal, Sao Chang College, Tuensang
- Tatem sarasadem : Wt.Tekanaro, Tir, Khar Watsü Telen

SENTONG II

Anogo : 11 Rongchii (April) 2025 Mapang : 9:00 Ako (Anepdang)

Mungdang Jungshir : Sungkomen Watsü Telen

- Sentong lenir : Mendenpur
- Lai zünger sarasademtsü : Wt. Rev. Watimenla Amlari, Asso. Pastor Women, Alempang Baptist Arogo
- Tebenjem ola : I/c, Wt. Watisenla Jamir Wt. Ayangla Ozukum, Wt. Imnatula
- Tenla meshiteta sarasademtsü : Wt. Akala Imchen, Asso. Pastor Women, Longpa Yimsen Baptist Arogo
- Tepela O : Wb.Thsüvisie Phoji, Deputy Commissioner, Mokokchung
- Temeja ken : Mungdang jungshir
- Tayongzükba O : Wb. Marsanen Imsong, Tir Ao Senden
- Sobaliba ken : Changtongya Watsü Telen
- Onük : "Telemtetba agiyim nung Yakpangsür" Wb. Rev. Dr. Wati Longchar, Executive Director, FTEAP
- Tatem sarasadem : Wt. M. Alemla Jamir, Tir, Mongsenyimtsür Senso Telongjem, Mokokchung

--- LOKTI CHIYONGBA MAPANG ---

SENTONG III

Anogo : 11 Rongchii (April) 2025 Mapang : 1:00 Ako

Sentong lenir : Mendenpur

- Sarasademtsü : Wt. Asenla, Asso. Pastor Women, Kinunger Baptist Arogo
- Osangtem agiba mapang : Tongti Zülur Osang Luden balala Osang Temzüng Luden Osang Auditors Osang Pangzüng Luden Osang Nungtet Luden Osang
- O Lemtep mapang :
- Menden tatem O :
- Menden melentepba : Wt. Maonginla, Taoba Tir
- Menden tasenpur atema sarasadem : Wt. Rev. Talijungla, Asso Pastor Women Ungma Baptist Arogo
- Watsü anthem :
- Tatem sarasadem : Telok

TEMETETTSÜ:

1. Onük jembir shia 30 minutes.
2. Tepela O, Tayongzükba O, Salem O, Ni ya shiner, tejembir shia 7 minutes.
3. Watsü Mungdang atema tenla sarutsü 11 Rongchii (April) 2025 Anepdang.
4. Inti Mungdang Mapang Ken kaket, Lenpir, Metsüpong, Aotsür Jenmung kaket ayoktsü.
5. Lokti chiyongba mapang 11 Rongchii (April) 2025 Anüngdang alitsü.
6. Aotsür ajak küm 18 nungi tema 23 Buba Watsü Mungdang sentong nung adentsü pelashishia jaoker.
7. Mungdang mapang asen sobutsü mera keta sobur arutsü metetdaksür.
8. Timsür - Sangtemla Youth Association.
9. Iba Inti Mungdang takok asoshi ajaki sarasadema atadi.



TIR YIMYIM YIMOBILEM (EDITORIAL)

DIMAPUR TUESDAY, APRIL (RONGCHII) 08, 2025

Lokti nung tebilemtsü

Asen lima nung lokti tebilemtsü ya arogo tebilemtsü kümer arogotemi anepaluba ya ajak asoshi teimla aser teyari angudak sentong tajung ka kümogo. Atangji, arogo ya lokti, anungji arogo tebilemtsüa lokti tebilemtsü akümer, anungji koba sobaliba aser inyakyim agi loktiliba topur ajung raksatsüsa aser lokti tipmedemdaktsütsüsa inyaker aser benschir, item jagi arogo aser yimten nunga timtem agütsütsü. Iba jagi sobaliba tamajung azüoktsü asoshi yimteni ozüing yanglur aser arogoi Tsüngrem temeim agi aleper tesayuba aser tangatetba tajung agütsür. Aji oda, tanü asenok tendak lokti menentsüba mapatemji yijemba, mozümora achiba aser nüktapangta mapatem dang masü saka tetsür o tetsür na aser tebur o tebur na apuani kuma medemba, tanur tain ajak mobile phone lar akümba aser suseta asütsü bilemba tebilemtsütem agi asenok loktiliba mesüngjemteti kümogo. Iba ama mapang ka nung arogoi nübortem nem tangatetba agüja inyaktsü asoshi “Social Concern” telok tenteta inyakba sentong ya mapang den sütepa inyakba mapa ka asütsü. Atangji, lokti tebilemtsü ta süaka, lokti tebilemtsü ya lokti nungi tenzüker masü saka kibong ka nung nisung ka taküm nungi tenzüker, anungji lokti tebilemtsü anema raraba tongpang ya kibong aser kija den raratsüsa akümer. Ibayongji, asenoki lokti temenen anema lokti senden tulu ayongzüka akayonga makoker, saka lokti temenenjiang ano tuluba aser teimba akümer. Aji oda, asenok arogo nungertemi lokti temenen anema lokti külem ser raraba tongpangji yi tongpang ya ka asütsü. Iba tongpang nung asenoki lokti senden aiben ayongzüka agiogo, lokti ayongzüka yimti yimdong sema yi anema ayimtenaka jajaogo, yi pongdanga aika pua raksatsüogo saka asen lima nung yi ajem aser yi ayok manener. Aji oda, lokti temenen anema lokti külem ser inyakba agi lokti tebilemtsü akoktsü asübo, Nagaland nungang yi tongpang ya koker lila. Kasaji, ozüingi memelaba mozümora ayokba aser achiba ya lokti tebilemtsü kümer lokti senden ayongzüka nokdangba agi akoktsü asünungbo koker lila. Aji oda, lokti temenentem anema inyakba mapatem nung asenoki külem ser ajuruba takok aser tamakoktem jembidang, tang tashi nungbo asenoki lokti temenen tenzükdak masü saka lokti temenen jajakdak lenmang nung shi azü anema rarar ama raraba agi asenokang akoksar ta rajemtsüla, kechiyong lokti temenen ya shi azü atenba temang ka masü saka temenen tanela lir, anungji lokti temenentem anema raraba ya tanüla tongpang lir. Ibaji kodang asenoki angateta raradir, idangjibo asenoki lokti temenen tenzükdak kibong aser taküm bushia aotsü. Tanübo yi aser mozümora achiba anema raratsüba yabo tongpang tilaka dang kümer, nisungtem shiruru ama kümer, kin kidong mebendang mezüpelangbabo yutsür, atsü apong mebendang tetsüri tetsür den aser tebur den kibong kümer apuani kuma linüba temenen agi asenk kibong aika shirangdagi aser item mapatem jagi asen lokti menentsür. Item tongpang tejen aser mobile phone lar akümba tongpang tasen den raratsüba nok o nüji tanga kecha masü saka Tsüngrem o lir, anungji Social Concern luden nung alir shia atema lokti temenen anema raratsüba hadirji sarasadema Tsüngrem o bushia angatettsü merangtsüla. Aji oda, iba tanela nok o nü, aji Tsüngrem o, bener lokti senden ayongzüka jajatsüba masü saka lokti menendaktsüba nisung aser kibong shiaji bushia oa Tsüngrem temeim aser taochi o jembitsüla. Parnokjia Tsüngremi meimer ta tonga oagi ashitsübaji, atangji, Social Concern Committee nung adenertem dang masü saka tamanger shia khuret aser mapa asütsü tim. Ibajiang shitakba sannükba mapa asütsü, ibayongji asenoki arogo nung ita sen agüja ayuba sannüker ya dang sannüker masü saka lokti aser arogo memenendaktsüi nisung shia sannüker ama kümer inyaktsübaji Laishiba tesayuba lir. Aji oda, kidang kbong nung tsüraburtemi pei san, aji pei chirnurtem, junga menüktetra aser lokti nung “Social Concern” aser arogotemi pei san, aji arogo nung züngsem, mazüoktetra aser tajungba kuma memelenshidaktsüra, lokti tebilemtsü indang süoki ia bilembaji pongmang nung timtema pongmangba amai ka dang asütsü.

OLEMSABANG

ASENOKIASEN LIMA TEMENUNGRATSÜ LIMA KA KÜMA YANG LUDI

~ L. Kika Pongener

(Yashi adok nungi...)

Aji oda, bendanglen alir ajaki pei tetsü-tasoyim menungratsüsa yimdaklirtemi sentong tajung atongtsü kanga tongtipanga ta bilemer. Jokorla, bendanglen alir teimba ka pei tsürabur, adianu, kinunger ajunga süa-madoker shinga mali....Yongji aikati pei yimdaki aotsü kangabo menungraa mebilemer sudi ta bilemer. Anungji yimdaklirtemi bendanglen alir sensosanger ajaki pei yimtsüng menungraa yim bushia arunutsüsa sentong tajung atongtsüla. Talisa, asen limaji asenoki telinutsü tesem ka kuma yanglutettsüla. Tangar lima nungpo yimtsüngtem ya 'Model Village' kuma yanglur, bendanger (Foreigner)-temia dena tereprangi arunutsüsa 'Tourists Village & Tourists Distination' kuma yangluteter, anogoshia bendangertem tereprangi aruba agi sen aadak tesem tajung ka kümer takar kuma jangradema aliba angur. Asenok-ia asen limaji 'Tourists Distination' kuma yanglutettsüsa lenmang sadema dang lir. Tsüngremi asen lima ya tekong-tenem tobur tajung moaja lir. Anungji asenoki asen limaji telinutsü aser temenungratsü lima ka kuma yanglutettsüsa yimdaklirtemi sentong tajung atongtsüla.

Akhidangpo asen Aotsür Aor kibalembuba ya pei yimtsür-yimer tsüngda nungdang kibalembu sutepa lia aru, yongji chirnur-semchi-semnurtema libaliro, chia-ajemba, jakla-yimya, jembi-shinuba oyim-osu ajakji pei yimtsür-yimer yimyaliro nungdang liromedema lia aru. Ajisüaka, tanü putu nungpo asen Aotsür Aor alima nung aliba kin tanak-temesung ajunga den sendaktepa kibalembutepa lia aor. Yongji item chirnur aser semchi-semnurtem jagi pei tsürabur soa intetba taso-limaji tsüraburtemi kechi komaka rasaa ashiyongjia kangapo suoki yia mebilemer aser nuklai marur. Item chirnur aser semchi-semnurtem jagi kodaser asen Ao oshi jangraa jembitsü (?) Item chirnur aser semchi-semnurtem jagi kodaser asen sobaliba benschitsü (?) Aser parnok jagi kodaser asen yimtsüng menungraa bilemtsü (?) Tangar oda yutsür Dimapur & Kohima jila nung soa inteter jala-jabasotem dang asenok tsüraburtemi pei tetsü taso-lima indang otsü rasaa ashiyongjia tenok-tenoka suoki yia mangar, kechiyong parnok Dimapur & Kohima jila nung dang soa intetji parnok tekolok shisatsü nungji ibaji dang enoka lir.

Asenoki laishiba nung züngra, Yihuda nunger bendang lima nung alar tia nung alidang, Nehemia o Daniel nungeri pei tetsü tasolima Yirusalem yimti tsütsü tejak shir elenji repranga kijiba lapoker sarasademba angur. Babylon chuba Nebukadnezzar ozüing tesashi agi parnoki amangba Yihova Tsüngrem mekülemtsü tenokdangba liaka, parnoki amangba Tsüngrem aser pei tetsü tasolima Yirusalem yimti kodanga mamatok. Atangji, tanü asenoka jila balala bendang semer nung prokshia alidang, Yihuda nungeri pei tetsü tasolima Yirusalem yimti menungraba amaji....Sensu ajaki pei tetsü tasolima mamatsüla aser meimtsüla. Yimdaklirtem-ia sensu ajaki asen lima aser asen yimtsüng menungratsüsa kanga shisa kaa asen lima aser asen yimtsüngji telinutsüka aser temenungratsüka yanglutettsü asalentong tajung atongtsüla. Aji oda, temzüng-ozüing agi jateptsüba masü, saka sensu ajaki pei tetsü tasolima menungraa arunutsüsa telinutsüka aser temenungratsüka yanglutettsü sentong tajung atongtsüla. Aji oda, mesura asen chirnur aser semchi-semnurtemi asen lima menungraa mebilemtsü aser pei yimdaki arutsü menungraa mebilemtsü. Ashiko, putu ka-ana sulenbo Ao lima yimtsüng aika nung haji-hakok, leni-maor, tantsür-tambur kar dak alaka....Tashi-kar aturar aikati pei yimtsüng toktsür jila bushia aotsü amai nukla nung angur. Anungji asenoki asen lima ya telinutsü lima ka kuma yanglutettsü sentong tajung atongtsüla-a ta temulong nung kanga rongga bilemba olen kar lemsateper.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Barcelona nung Evangelical Tenla ki 17 shibangtsüsa lir



Barcelona nung aliba Sagrada Familia Tenla kidang tekülem sentong agiba sülen tamangertem senshiba mapang tangokba noksa nung angur.

April 07, 2025: Barcelona nung aliba evangelical Arogo Tenla ki 17 shibangtsüsa tensa ka nung lir, kechiyong local sorkar ketdangsertemi Tenla ki aliba tesemtem nungji terenlok mapa inyaksü tebilemba lir.

Ketdangsertemi Arogo kar dangbo Tenla kiji belenang ta tuyuogo.

Tawa Consell Evangèlic de Catalunya (Evangelical Council of Catalonia, CEC) senden nung Tenla kitem shibangtsü tuyuba atema tebilemtsü akaba lemsatep. Tenla kitemji shibangra tamanger meyijang aika tekülemdak malitsü.

Talisa industrial district- Sant Andreu district nung evangelical Tenla ki aika lir aser item Tenla ki aika industry osettsüset ayuba building mesüra temeket

nung lir. Item kiojenji karbo Arogoi alizükba lir saka karbo para agüja agiba lir.

Local sorkari train station ulushitsü aser tanga terenlok mapa balala inyaksü atema Tenla ki aienshitsü tuyur.

Yaküm December ita nungi tenzüka ketdangsertemi Tenla ki 11 bo mita ogo.

Local ketdangsertemi, "Industry li nung tekülem ki memelar, anungji Tenla kitemji aienshitsüsa akümtsü," ta metetdaksü.

Evangelical Council of Catalonia-i Arogotem dang Tenla kitemji wazüka ayutsü temeden atema parnoki yaritsü ta shiogo. CEC Executive Secretary, Guillem Correa-i, Barcelona nung Mayor den senden mena iba tebilemtsü


lemsatepogo, ta metetdaksü.

City Council-ia Office of Religious Affairs ajanga amaliteptsü aser ken o jembitsü melungba atema CEC-ia local ketdangsertem dang pelaba lemsatepogo.

Correa-i, kobi melii senden ka amentsü aser iba senden nungji district manager aser city council religious affairs commissioner-a adentsü imlar, ta metetdaksü.

Iba senden nungji evangelical council-i ketdangsertem dang, lenmang kar bushitsü mesüra Tenla ki tanga tesemi belentsü atema mapang agüjang ta mepishiba den külemi Arogo kangabo takoksa mangutsü atema sorkar dang senotsü teyari-a agüjang ta mepishitsü.

Kansas nung nisung kati pastor Arul Carasala khaset



Gary Lee Hermes (ablen) aser Pastor Arul Carasala

April 07, 2025: Seneca, Kansas nung Saints Peter & Paul Catholic Arogo Tenla kima nisung kati pastor, Arul Carasala khasetba sülen Arogo züngsemtem mangyimdar.

Brihostibar (April 3) nikongdang tambur kati pastor dak injang khaloktsüba Betty Haug-i angu. Nisungbaji arrshi küm 66, Gary Lee Hermes lir ta jangjaogo.

Hermesch ya Nemaha County nung intet saka tawa Tulsa, Oklahoma-i arua alir. Hermes-i putir Carasala dak injang asemen khaloktsüba sülen pai pasasa Nemaha County Sheriff Office-i oa iba osangji metetdaksü. Iba office nungji par adianu-a dispatcher mapa inyaker.

Carasala dak injang khaloktsüba sülen pa hospital-i anir ao, ajisüaka mekümzükteti asü.

Carasala ya shidakbabo India nungi lir saka pai US senso agiogo. 2011 küm nungi tenzüka pa Saints Peter & Paul Catholic

Church nungji pastor inyaka aruogo.

1994 küm pa 'ordain' asüba sülen 2004 küm Kansas-i ao aser 2011 küm nung America senso aküm. Pa ya Kansas Archdiocese kübok Nemaha-Marshall region nunga dean inyaka liasü.

Hokolbar nikongdang Hermes Nemaha County District Court matsüngdangi ao, iba sülen nisung tepsetba atema pa anema ken o benokogo.

District Court Judge Scott M. Anson-i April 15 nü iba ken o angadangtsü lemtetogo.

Carasala asüba sülen mapang tatsüka tsünga Arogoi sentong ka ayongzük aser nisung aika adenshia asür nem akhüm agütsüogo.

Seneca Knights of Columbus züngsem aser Arogo nunga züngsem, Greg Kohake-i, Carasala ya pastor ka dang masü saka medemer tajung ka liasü, aser tesüiba küm 14 tsünga tena tesendaktep kanga junga aküm, ta

metetdaksü.

Kohake-i Arogo züngsemtem atema dang masü saka aibelensang densema ajak atema sarasademjang, ta mepishia metetdaksü.

Carasala-i ajak den tesendaktep junga ayu, talisa pai Saints Peter & Paul School nung azünger tanurtem kanga meima liasü.

Carasala junga meteta alir ka, Tina Strathman-i, putiri par jabaso kiyimba kulizüing agitsüba aser semchirtem baptitsüba bilemteta jembii.

Carasala-i mapang shia school tanurtem den dodgeball asaya aser ajak den salema sasapelaa jembishinüa liasü.

Kansas City Archdiocese nung Archbishop, Joseph Naumann-i, Carasala ya nendaka tenzüka pastor ka liasü, aser pa asüba ajanga aika melung raksar, ta metetdaksü.

Paisa, "Ajaki meima aliba putir, lenir aser tembar ka asüba atema onoki kanga jashia mangyimer," ta metetdaksü.

Arogo nung religious education director, Kris Anderson-i, "Putir Carasala ya kanga nendaka aser jangrabangra tenzüka pastor ka liasü. Pai Khrista meimba aser Arogo meimbaji pai par santem kanga meima anepaluba ajanga kuli angur," ta metetdaksü.

ANOGO ABEN TSÜNGREM DEN

Tanela Agi Sünga Liang

- Efesa 5:18

Tanela agi sünga alibaji ochi lir aser ibaji sayutsüngiren dang aliba arogo ka samadoktsü lendonga lir. Iba tanela temeshi nübu aser Pai tenzüka mapa nung mejangjaba ajanga adoktsü akok. Putu ka shi tesayurtemi O tetezü nung ammeter tamanger taküm nung tanela temeshi mapa sayu. Kari tamangertem dak tanela temeshi i mapa inyakba Lairen ochibaji tai ratettsü. Nübusen aser tanela temeshi mapa indang sayutsüngibaji nüngdaka lir. Lairen tesayuba nungi pa mapa indang ratettsütsü tenügdaktsü lir. Tanela mapa kanga kümdanga ratettsü tenügdaktsü.

Tanela agi sünga alibaji kar nem dang sempet balaka agütsüba masü, saka ibai tamanger ajaki anogo shia mapa nung metetta alitsüba mapa lir. Tekümtet agizükba mapang Tanela Temeshiji tamanger shia dangi aita alir. Tamangi Khrista dak lidaktsür aser kangki nung Pa mapa aser Pa shia arubaji tanelaren temoatsütem kimong lir. Tsüngremi tekümtet mapa inyakba nung tongtipang kaji Tanela Temeshi yokbaji lir. Shiba dak tanela mali, paji Khrista meyong masü ta Pauli Rom 8:9 nung zülü.

Tanabuba, Tanela Temeshi mapaji tasen tamangertem Khrista temang nung baptitsüba lir. Alima ajunga nung amangba ajanga iba mapa maneni ataloktsür. Ibai ajanga tamanger ajak Khrista temang Kibuba Yisu den lungjemdaktsür. Kodang iba mapa ataloktsüdir tamangertem meshitettsü aser Tsüngremer kibong nung tenzüker akümtsü tekümtet temaitsü ajener.

Kodang tamanger dak Tanela Temeshi nem teti talidak agütsüdir, iba nisung mapa ajak Pai azüoktsü. Sünga alibaji tamanger mapa nungi adoker. Mezüngbuba, temenen nungi temulung meyipba. Tanabuba, ni kechi ajak bendanga agütsüa Tanela Temeshi-i azüokdaktsüba. Tasembuba, Tanela Temeshi-i Tsüngrem tenangzükbatem atalokdaktsüba metetta Tsüngrem nem tenüngsang agütsüba. Pezübuba, Tanela Temeshi shibai kü taküm sünga lir pai kü telemtetba aser mapa ajak azüoker ta amanga tamang agi inyaksüla. Iba nungi adokbaji Tanela Temeshi ajanga ain aser Khrista adenba tejangja nung Tsüngrem mapa inyaksüla.

China-i missionary mapatem nokdangtsü atema telemtetba agiogo

April 07, 2025: Anogo ishika tejaklen China nung Chinese Communist Party (CCP)-i linük nung missionary tem mapa nokdangtsü atema telemtetba agiogo.

Iba tenokdangba ya taruba ita May 1 nungi mapa küma benoktsü.

Iba ozüing kübok bendanger sayutsüngirtem nokdangtsü, pei yimsü lemsatepba nokdangtsü aser sorkar dang nungi temelaba magii yimsü dak sendakba organizations tentetba nokdangtsü.

Item tenokdangba ya linük security ajungkettsütsü atema lir, ta CCP-i metetdaksü.

Mapang talangka nungi CCP-i yimsü dak sendakba inyaksangshi balala nung melung malemer aser Communist Party tangatetba kübok alitsü tuyur.

Chiba nung sorkari melaba Arogo aser Associations ji protestant Three Self Church aser Chinese Catholic

Patriotic Association ama telok kar dang lir. Item Arogotem jagi CCP tangatetbatem ajungkettsür aser kentenba, sayutsüngiba aser loktiliba sentongtem nung linük Tir Xi Jinping tenüing ajungkettsür.

Sorkari memelaba Independent house church temibo mapang shia timtem ajurur, linük security anema inyaker ta tai tonglokja lenirtem aser züngsemtem apur.

Taküm küm tetenzüklen China sorkari yaküm yimsü dak sendakba telok balala anema inyakba atema nüma tanga report ka sangdonga liasü.

China nunger messaging app aser social media platform WeChat ajanga China Ministry of Public Security-i yimsü dak sendakba organizations anema inyaksü atema technology nung sen aika indokba metetdakja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Temechi****(adj)** ano naro mepungya, ano mesala (bud)

* Naro temechi adoka alidang mapettsüla.

Temedem**(adj)** kasasa, julangjushi mali, teputep (equal in length, uniformity)

* Tanurtem tar kanga temedem liasü.



Tir Yimyim

OLONG PAITEP # 7116

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti

- (5)

4. Tsük rudenba

- (5)

6. Temzüng tesashi

- (5)

8. S _ _ _ i

- (3)

9. Nisung telemasa

- (3)

10. Anogoshi

- (4)

12. Ajanga aor

- (4)

13. Tsük rizüngdak

- (3)

14. Tebang nungi adokba

- (3)

16. Süngdong tatembangtiba

- (5)

17. Meputep

- (5)

LANGTSÜNGLEN

1. Tenük telong

- (9)

2. Committee dang ajar

- (5)

3. Yagi ki okdoker

- (7)

5. Yim lenmang

- (5)

7. Temoatsü keter meyipa aruba

- (9)

11. Kanga junga menemba

- (7)

12. Majinü

- (5)

13. Tzüma nung senzüba

- (5)

OLONG PAITEP # 7115 TELANGZÜBA**TIPIEN :**

2. Bangsemo, 6. Tiptem, 8. Jen,

9. Talila, 11. Aren, 12. Tzübo,

14. Alia, 16. Angati, 17. Odi,

18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,

5. Milen, 7. Tulu, 10. Laza,

11. Aben, 12. Tiyong, 13. Ajizük,

14. Aitsü, 15. Tasa, 16. Aina.

NAI-A YA METETTER MA

Cambodia nung Ronin ta ser koya kati 'wartime explosives' 100 tema putetba atema Guinness World Record ka yangluogo.

Ronin ya African giant pouched koya ka aser landmine-detecting rat lir. Ronin-i 2021 nungi Cambodia kübok tesem balala nung landmines 109 aser unexploded ordnance 15 tashi ngutetogo.

Ronin koya ya Apopo ta ser non-profit organization kati training agütsü aser iba telok yagi küm 30 tema koyatem dang landmines bushitettsü training agüja arur.

CBI-i Guwahati nung defence accounts ketdangsür ka apu**Guwahati, April 7, 2025**

(Agencies): Central Bureau of Investigation (CBI)-i Guwahati kübok Satgaon nung Controller of Defence Accounts (CDA) ketdangsür kati süpokrem agiba atema puogo.

Iba nisung ya Mrinmoy Ghosh ta jangjaogo aser pa ya CDA nung Accounts Officer lir.

April 3, 2025 nü First Information Report (FIR) ka benokba nung ajemdaker Guwahati nung Anti-Corruption Branch (ACB) ajanga bushisüngdanga arudang

ketdangsür puogo.

Ghosh-i ochimashi mapa inyak aser pai private contractors o vendors dang nungi official bills agizütsü atema süpokrem meshi ta FIR nung tai tonglokja lir.

FIR nungsa M/s Shyam Sundar Ravi Prakashm, M/s SN Distributor, aser M/s Durga Motors kibur Sabita Chamaria aser Chamaria den inyaker Bikash Sarkar na tenüng densema lir.

Ghosh aser Chamaria aser lar mapa inyakertem tsüngda sensaksemba indang FIR

nungsa shia lir.

Parnoki WhatsApp ajanga süpokrem agitsü jembitepba aser March 4, 2025 nü Sarkar-i office kima nung Ghosh nem süpokrem agütsüba indang shia lir.

Maneni, March 27 aser April 2 anogotem parnok tsüngda bills aser arrangements agiba aser Ghosh'er office anasa April 3, 2025 nü süpokrem agütsüba indang FIR nungsa shia lir.

Iba bushisüngdang ya Deputy Superintendent of Police, CBI, ACB, Guwahati J.S. Yadav-i inyaker.

Tripura eye hospital yanglutsü atema Rs 100 crore lezmüksü**Agartala, April 7, 2025**

(Agencies): Tripura Chief Minister Manik Saha-i eye hospital tajung ka lapoktsü atema Rs 100 crore lezmüksüogogo.

Hepatitis Foundation of Tripura-i Agartala nung World Health Day sentong ayongzüka agiba nung jembidang "sorkari state nung healthcare infrastructure tashi itdaksütsü meranger" ta CM Saha-i ashi. Pai health portfolio amsema inyaker.

"Onoki Maternal and Child Clinic ka lapoktsü aser iba mapa teinyakdak lir. Ministry of Development of North Eastern

Region (MDoNER) nungi Rs 150 crore tema nguogo" ta pai ashi.

"Taneptsü dang nungibo noktangba tajungba. Asenok küm küma lira aser temang anema ayutsü merangra asenoki tashidak aika nungi jenbua litettsü" ta CM Saha-isa ashi.

Taküm state budget nung eye hospital atema Rs 100 crore lezmüksüogogo aser iba nung modern facilities adentsü. Maneni, tesem balala nung Primary Health Centres (PHCs) lapoka odar ta paisa metetdaksü.

"Tripura nung tensa tajung kümogo aser private hospitals

aser investors-i tejangraba shiogo. Onoki nisung ajak anema aser pelaa lidaktsünür. Tripura nung health sector kanga renlokdar" ta Saha-isa ashi.

CM Saha-isa drug addiction indang khuret lemsatepdang "injectable drug use ajanga HIV/AIDS aika puteter. Anungji nübortemi drugs anema raratsü atema longjemtsüla" ta ayongzü.

Paisa tanur asü dang kibong küm daksüba noktangtsü atema olen ka ashidang "iba inyakyim ya kanga majung aser nisung ka temang aser tekolok nung timtem jenti bentsür arur" ta ashi.

GOVERNMENT OF NAGALAND**HOME DEPARTMENT:: POLICE 'B' BRANCH****NO.POL-B/SWR/ESTT/1/2/20(Pt)****Dated Kohima, the April' 2025****ADDENDUM**

With reference to Government of Nagaland Home Department: Police 'B' Branch, PRESS RELEASE/ADVERTISEMENT NO.POL-B/SWR/ESTT/1/2/20 (Pt) dated Kohima 20.01.2025; the following Addendum is made:

(1) Serial No.5: Welfare Organizer, the number of post is increased from 01 (One) post to 02 (Two) posts.

Other terms and conditions of the advertisement remain the same.

(KUKO MERO)**Secretary to the Government of Nagaland.****GOVERNMENT OF NAGALAND
DIRECTORATE OF SCHOOL EDUCATION****NAGALAND: KOHIMA****NO. ED/EST/B-1/2019/19/196****Kohima, dated the 4th April 2025****NOTIFICATION**

In pursuance of Advertisement No. ED/EST/B-1/2019 dated 11th November 2024 and approval of the Government vide letter No. DSE/MISC/12-128/Recruit/2020/966 dated 2nd April 2025 and on the basis of marks secured by candidates in the Written Test, Driving Test and Oral Interview, the following candidates in order of merit are selected for the post of Drivers under the Department of School Education.

S No	Name	Roll No	Remarks
1	Kediletuo Suokhrie	308	Selected
2	Yimjonglepda Chang	166	Selected
3	Thejasetuo Pienyu	19	Selected
4	Dziesebeituo Tseikha	89	Selected
5	Vituo Rio	438	Selected
6	Frento K Zhimo	432	Selected
7	Dziesesalie Vizo	338	Selected
8	Peter Thupitor	62	Selected
9	Kevisiekuo Suokhrie	186	Waiting List
10	Nechenlo Messen	117	Waiting List
11	C Chenlem Walim	230	B/T Konyak (Selected)
12	Hamlong Phom	164	B/T Phom (Selected)
13	Lumtsase S Sangtam	23	B/T Sangtam (Selected)
14	Murita Nienu	52	B/T Chakhesang (Selected)
15	Langphong P Konyak	381	B/T Konyak Waiting List
16	Candidate not available		B/T Phom Waiting List
17	Candidate not available		B/T Sangtam Waiting List
18	Zhokuve Rhakho	129	B/T Chakhesang Waiting List

The Waiting List will remain valid for a period of 1 year from the date of publication of results.

(THAVASEELAN K) IAS
Principal Director.

MULUNGNEN O

Onoki teti meima aliba ojala asür **Wt. Purkümla Longkümer** (Molungyimsen) mapang tatsüka temang manemi anepaludang aser March 29, 2025 nü kanga dang ajungbena la iba akümüli toktsür aodang shirnokisa aria bilema rongsen, nübu, shisatsü aser sarasadem agi ozü den yaritepogo, nenok ajak dang kangasa pelaba metetdaksür.



Asür Purkümla Longkümer
17.02.1944 - 29.03.2025

Talisa Eden Medical Centre aser Christian Institute of Health Sciences & Research (CIHSR) nung doctors & nurses dang alakteta pelaba shisemer.

Ozüü nenok nem meyipa agütsütsü kecha maka saka asen tulusang Tsüngremi nenok mapa tajung asoshi moajangma ta onoki sarasadem.

- Kinungertem.

MULUNGNEN O



ASO : 06.03.1932 - ASÜ : 03.04.2025

Onoki teti meima aliba ojala **Asü Imdonglepla (Changki)** ajungbena April 3, 2025 nü akümlir wadang tembang dang kija, arogo, lokti tentet balala, kidanger, kinunger aser temeimer temi nübu, rongsen aser sarasadem agi yaritepba asoshi kinunger temi pelaba lemsateper.

Nenok kija shia dang ozüü pelaba melemsatetba asoshi kanga sasar, saka asen Tulusang Tsüngremi nenok ajak mulamushia moajang ta sarasademtsür.

~ Temeim Kinungertem.

KANGA PELAR

Rongchii 3, 2025 anogo nungi Ungma Jenangsanger alushi nung merok mi lendong tulu adoka ozü alushi arem wazüka ayuba meta tuluka rungdokogo. Iba merok mi penseptsü asoshi teyaritep nübu jenti tesem aika nungi arua anogo asem tashi yaritepba yong iba merok mi remseptetogo. Anungji ozü Ungma Jenang Kosasanger pusu mendeni teyariteper ajak dang kanga pelapa lemsateper. Ajaki yaritepogo saka talisa item telok tenüng ateta pelaba shisemer:

1. Mokokchung District Administration
2. 12th Assam Rifle, Mokokchung.
3. Fire service Mokokchung
4. Disaster Management (SDRF) Mokokchung
5. Ungma Yimpang Pusu Menden
6. Kupza Village Council
7. Marepkong Ward Yimden
8. Mongsenbai Ward Yimden
9. Kumlong Ward Yimden
10. Soyim Shisaluyimer Telongjem
11. Mr. Mayang Jamir (Settsü)

Sdl-

UNGMA JENANG KOSASANGER PUSU MENDEN

Dominican Republic-i Haiti den arrtsü nung security akangshir

Santo Domingo, Rongchii/ April 7 (Agencies): Kidanger linük Haiti nung tensa mejungi akümba mapang Dominican Republic-i arrtsü nung security akangshitsü aser nüburtem linüki senoka aitba azüoktsü atema jenjang ishika agiogo.

Tir Luis Abinader-i Deobarnü, arrtsü security timba yoktsü ta shiogo. Haiti nung mepetmesü adoker aliba ajanga nüburtem tejenokdak bushiba mapang par linük dang inyakyim tesashi benoker aliba salatsütsü ayongzükaka Abinader-i iba telemtetba ya agiogo.

"Onoki arrtsüü sepai 9,500 yoker aliba den bendenloksema ano sepai 1,500 yoka surveillance akangshitsü," ta Dominican lenir yagi ashi.

Abinader-isa, linük ana arrtsü nung jara tasen yanglutsü atema pai temelaba agütsüogo, ta ashi. Linük ana arrtsü ya km 300 dak tema lir. Tang tashi nung arrtsü nung jara km 54 bo atsür lir.

Tir-i ashiba agi, tang tetuyuba agütsüba ajanga arrtsü



Luis Abinader

nung jara takaratiba nung yangluyonga oa km 13 bendenloktsü.

Abinader-isa, migrants tem linüki aitsü aser lidaktsütsü atema teyari agütsürtem nokdangtsü atema temerenshi tesashi agütsütsü asoshi temzüng ozüng nunga temelenshi bener arutsü sentong lir, ta ashi.

Haiti nung tensa tamajungba küma aoba mapang ka nung Dominican Republic-i arrtsü nung jenjang tali agidar.

Haiti nung taoba küm nungi mepetmesü tulu adoker lir. Temzüng ozüng alema

inyaksangshirtemi linük yimtiba Port-au-Prince tuluba ka azüoker lir.

Kenya-i sepaitem yoka teyari agüjaka Haiti nung transitional sorkari item teloktem mazüokteter mesüra azüoktsü memulunger. Taoba ita nungi tenzüka ano azütokshi lendong tali küma odar.

United Nations sangdong ka ajanga ashiba agi, 2024 küm nisung 5,600 da tema tepsetogo aser nisung million ka dak tema pei talidak ki toktsür jenshiaogo aser parnok timba kidanger Dominican Republic nung jenoka lir.

Israel-i Gaza nung osangbenertem süki amak; nisung ana asü

Gaza City, Rongchii/April 7 (Agencies): Israel-i anüng ajanga Gaza nung osangbenertem süki ka amakba sülen nisung ana süogo.

Honibar anepdang Khan Younis nung Nasser Hospital anasa tesem ka amakba mapang osangbenertem aika yiruogo, ta local media sangdong balala ajanga metetdaksü. Osangbenertem maka aruba nung iba ya tesüsabuba tatalokba lir, aser Gaza nung raraba mapang press asaa amakba atema Israel aija arudar.

Southern Gaza nung iba mozüki kima süki ka anepdang 2 ako meta amakba sülen mi adok aser osangbener Helmi al-Faqawi aser nisung ka tenüng agi Yousef al-Khazindar tepsetogo, ta Palestine indang Wafa news agency-i metetdaksü.

Quds News Network-i online ajanga lemsatepba video nung süki nung mi jangrua aliba aser nüburtemi mi temseptsü merangba nguogo.

Osang ajanga ashiba agi, iba



Khan Younis nung osangbener Islam Maqdad'er ki raksar aliba noksa nung angur, kong April 6, 2025 nü Israel army temi amakdang la den lar jabaso aser kinunger pezü tepseta liasü.

lendong nung osangbener trok densema nisung teku yiru aser parnok karbo kanga mejungi yirur lir.

Quds News Network-isa, osangbener Hassan Eslaih aser Ihab al-Bardini na mozükidang mejanger aliba sayuogo,

Osangbener Ahmad Mansour-a temang kanga mejungi arongba sülen taküm asoshi raraba mapang ka lir, ta kasa sangdong ajanga metetdaksü.

Israel-i Hombar anepdang Gaza amakba sülen nisung 13

tepsetogo, ta medical sources balala ajanga metetdaksü.

Network-isa, Jabalia refugee camp amakba mapang nisung ana tepset aser Gaza City kübok Zeitoun district nung nisung asem tepseta liasü, ta metetdaksü.

Wafa-i ashiba agi, Deir el-Balah nung nisung ana tepset aser Gaza City north len al-Jurun tesem nung nisung ka tepseta liasü.

Osangbener Islam Meqdad den la kinungbo aser tanur tepsetba sülen anogo ka lir osangbenertem süki ya makogo, aser Gaza nung osangbenertem tepsetba tali küma odar.

Watson Institute for International and Public Affairs-i ashiba agi, Gaza nung rara ya media worker tem atema tesashitiba kümogo.

United States nung amenkdaer aliba iba think tank report ajanga taoba hopta ashiba agi, Gaza nung rara tenzüka sülen Israel nunger sepaitemi osangbener aser media worker 232 tepsetogo.

Average nung hopta shia osangbener aser media worker 13 tepsetogo.

MULUNGNEN O

Pa shirang mapang nungi mangyimba anogo tashi kija kibong aser lokti tentet balala shirnokisa ozü den nübu, shisatsü, rongsen aser sarasadem ajanga yaritepogo, ajak dang kanga pelaba lemsateper. Nenok taküm Tsüngremi moajang ta aji ozü sarasadem.

Temeim Kinungtsü, Chirnurtem aser Kinungertem.



Lt. S. Rongsen
15.08.1947 - 01.04.2025

Nagaland nungi cricketer asyartemi takok tajung angu



Dimapur, Rongchii/April 7 (TYO): 4buba North East Cricket Development Council (NECDC) Achievers' Nite nung Nagaland nungi cricket asyartemi takok tajung nguogo. Iba sentong ya Gangtok nung agia liasü.

2024-25 BCCI domestic season North East nungi cricketer asyartem shirnoki tangar dang nungi tajungba asayaogo parnok tushitsü atema iba sentong ya ayongzüka agia liasü. Taküm iba sentong ya Sikkim Cricket Association-i ayongzüka agiogo.

Sentong nung Jonathan Rongsen nem North East Player of the Season (Male) naroküm agütsü. Season tepeyong nung pai run 769 yangluba den wicket 32 agiba atema pa nem iba naroküm agütsüogo.

Senior Men's category nung

Rongsen nem Best Batter narokm dena agütsüogo. Pai innings 22 nung run 769 yanglua liasü.

U-16 Boys category nung Aloto Sumi-i, Best Batter aser Best Bowler naroküm agizüka liasü. Pai innings 9 nung run 245 yanglu aser innings 8 nung wicket 27 agia liasü. Pai batting aser bowling naprongla nung kanga junga shilem agiba ajanga pa tarutsü nung Indian cricket nung nungtugu asayar ka akümtsü sempet aliba sayur.

U-23 category nung Mughavi Sumi nem Best Batter naroküm agütsü. Pai innings 14 nung run 557 yanglua liasü. Kasa mapang nung Yugandhar Singh nem Best Wicketkeeper naroküm agütsüogo. Pai innings 10 nung stumping 15 süja liasü. Item asyartem yangi kanga junga asayaba ajanga Nagaland

nungi asayar taungtem adokba sayur.

Kasa mapang nung Ranji Trophy nung Elite Division jenjang mesamadaktsüba atema Nagaland Senior Men's Cricket Team nem tetushi agüja liasü, koba domestic cricket nung state team tanem tanemi renloka aoba temaitsü lir.

Hon. Secretary Hyunilo Anilo Khing lenisüba nung Nagaland Cricket Association (NCA) delegate tem iba sentong nung oa shilem agia liasü.

Iba sentong ajanga asyartem tushiba dang masü saka Nagaland nung cricket asaya renlokyonga aoba sayur. Iba ajangasa Nagaland nungi asyartemi bendanga agüja asayaba kuli agütsür aser iba ajanga tarutsü nung takok tuluba atema lenmang sadema lapoka toktsür.

Brook England white-ball captain kümogo

Rongchii/April 7, 2025 (Agencies): Batter Harry Brook England indang white-ball team captain kümogo.

Arishi küm 26 tain asayar yagi Jos Buttler melenogo. February ita England team Champions Trophy nung tsükba sülen Buttler-i captain mapa tokja liasü.

Brook lenisüba nung England team one-day internationals aser T20 naprongla asayatsü, aser iba ajanga format ana atema captain balala shimtsü akok ta bilema aliba jangjatsüogo.

Yorkshire nungi asayar ya taoba ita 12 Butter indang vice-captain liasü aser pa ya Test captain Ben Stokes den Butter melentsü pur rognung ka ta züngshia aruogo.

"Pa ya captain mapa bendaktsütsü atema asadanga alirtem rongung ka liasü, saka maongka ya imlaba dang nungi takaraba aruogo," ta England men's cricket managing director Rob Key-i ashi.

"Harry ya cricket asayar tajung ka dang masü saka pai asaya kanga junga angateter aser team anaprongla anitsü nükla tejangja lir aser iba ajanga team-i asayamung, World Cup tem aser tongtibang



asayamungtem akoktsü asoshi teyari agütsütsü," ta paisa shisem.

Buttler yirur aliba mapang Brook lenisüba nung taoba küm September ita England team Australia den ODI asayamung ka asayaogo, ajisüaka pa tang mezügbuba England team full-time captain shilem agitsü lir.

Pa ya taoba mapang England Under-19 team captain liasü aser pa lensüba nung Northern Superchargers pur taoba küm Hundred asayamung asaya liasü.

Brook ya taküm Indian Premier League nung asayatsü liasü, saka pa workload achaayangtsü atema masayatsü telemtetba agi. England team Champions Trophy nung tsükba

sülen pa khen danga asaya mali.

Tests, 50-overs aser T20 nung asayar tongibang ka ama England-i pa asayamung ajak nung asayadaktsütsü sentong lira pa tanen makai asayatsü.

England asoshi taküm tongtibang asayamung anaji India den kidang lemluwa asayatsü aliba aser asükwa Australia nung oa Ashes asayatsü aliba ya lir.

Brook lenisüba nung England team mezügbuba West Indies den ODI asem aser T20 asem asayatsü, koba May 29 nü tenzüksü aser iba sülen Zimbabwe den Test asem asayatsü. Iba asayamung ya India den asayamung tenzüksü anogo 10 lia June 10 nü tembangtsü.

Iba sülen England team September ita South Africa aser Ireland den masaya tashi white-ball cricket masayatsü. November 12 nü Ashes metenzük tsüngda parnok New Zealand den white-ball asayamung ka asayatsü.

Brook lenisüba nung mezügbuba International Cricket Council asayamungji India aser Sri Lanka nung T20 World Cup asütsü, koba Ashes sülen taruba küm February aser March ita asayatsü lir.

Super Cup 2025 atema mapanglem sangdongogo

Rongchii/April 7, 2025 (Agencies): All Indian Football Federation-i, taruba Super Cup atema teloktem aser mapanglem sangdongogo.

Taküm iba asayamung nung April 20 nü mezügbuba asaya Bhubneshwar, Odisha nung Kerala Blasters aser East Bengal FC na asayatsü lir.

Asayamung ya May 3 nü tashi asayatsü aser asayamung akokba team ya 2025-26 AFC Champions League 2 Playoffs nung shilem agitsü atema maongka angutsü.

Round of 16 nung ISL team 13 aser I-League team 3-i shilem agitsü. Ajisüaka Inter Kashi dak sendakba nung ken

o mebenteti aliba ajanga I-League team tem tang tashi mejangjai lir.

Super Cup 2025 Round Of 16 Fixtures:

April 20: Kerala Blasters vs East Bengal

April 20: Mohun Bagan vs I-League 3

April 21: FC Goa vs I-League 2

April 21: Odisha FC vs Punjab FC

April 23: Bengaluru FC vs I-League 1

April 23: Mumbai City FC vs Chennaiyin FC

April 24: NorthEast United FC vs Mohammedan SC

April 24: Jamshedpur FC vs Hyderabad FC.

Shooting World Cup: Rudranksh Patil-i gold angu



Rongchii/April 7, 2025

(Agencies): Paris Olympics atema India shooting team nung mezüngoksemba sülen ita teku lir arishi küm 20 tain Rudranksh Patil-i tang mezügbuba ISSF World Cup nung gold medal ka nguogo.

Buenos Aires, Argentina nung Deobarnü tebur 10m Air Rifle final nung pai gold medal ngua liasü.

2008 Beijing Olympics champion Abhinav Bindra sülen Maharashtra nungi asayar ya India nunger rongnungi World Championships nung gold medal anguba asayar tanabuba kümogo.

Final nung tetenzük nungi pa temaba jenjang nung liasü aser pai gold medal elimination nung Hungary nunger asayar Istvan Peni koka liasü. Pai point 252.9 angu.

Cairo nung 2022 World Championships nung asayaba ama Patil-i kanga junga asaya aser final nung pai 10.0 ka anguba dak alaka tanungba shot ajak ya 10.7 aser tema dang liasü, kong mezügbuba five-shot series nung 10.9 ka anguba densema lir.

Mezügbuba series sülen

Patil ya 0.4 agi Peni dang nungi timba liasü. Tanabuba series nung Patil-i point 52.0 ngua elimination round metenzük tsüngda pa point 0.7 agi timba aküm.

Elimination series nung shot 14 nung patil-i 10.9 ana aser 10.8 ana densema 10.5 mesüra iba dang nungi timba tiben ngua pai gold medal nguogo.

Tatembangbuba round nung patil-i 10.7 mesüra iba dak tema 11 ben score asü aser shot trokbo 10.8 aser shot ana 10.9 nung khashia liasü.

Qualification nung Patil-i point 633.7 ngua pa tanabuba jenjang nung liasü. Qualification nungbo India nungersa Babuta-i point 634.5 ngua pa temaba jenjang nung liasü.

Paris Olympics atema qualifier nung Patil-i Babuta point 0.3 aser Sandeep Singh point 1.4 agi memenepi pa Paris Games atema Indian shooting team nung mezüngoksemi liasü.

Patil aser Babuta nati Olympic quota angu saka Patil-i trials nung Babuta aser Sandeep na memenepi liasü. Paris Games nung tena ya pezübuba aser 11buba nung tembanga liasü.

BILEMDANGANG

"Sakteta alidang meranga inyang; manemertem atema tinyaktsü kecha mali."